

AKASHVANI AIZAWL
REGIONAL NEWS BULLETIN
HEADLINES (EVENING)

- Chin ralthuam keng pawl pahnih inkah avanga Champhai district Zokhawthar a raltlan lutchu mi 3,000 an chuang tawh.
- Adviser to CM (political) Pu Lalmuanpuia Punte-in vawiin khan zofa pawl pahnih inkapte inkara boruak tha zawk a awm theih dan tur kawng dapin Zokhawthar leh Myanmar-a Khawmawi a tlawh.
- Kumin January thla atanga June thla chhungin Mizoram district 11 zingah Kolasib-ah ruahtui a tla tam ber a, Lunglei district-ah a tla tlem ber thung.
- Brazil-a BRICS khawmpuia tel turin Prime Minister Narendra Modi-a'n Rio de Janeiro a thleng.

<><><>

CHIN GROUPS CONFLICT

Chin ralthuam keng pawl pahnih inkah avanga Champhai district Zokhawthar a raltlan lut chu mi 3,000 an chuang tawh.

Champhai district Police hotute hnen atanga Akashvani Aizawl thu dawn danin nimina Chinland Defense Force - Hualngoram leh Chin National Defense Force (CNDF) inkahna avang khan vawiin thlengin mi 2,845 chu sahimna zawngin Zokhawtharah an rawn tlanchhia a. A hma, Nilaini atanga CDF-Hualngoram leh CNDF te an inkah hnu khan a mi 400 thelh raltlan an lo awm tawh bawk a. Raltlan tam ber hian an chhungte an bel a, belh tur neilo te chu Zokhawthar YMA Hall ah dah khawm an ni. He tih lai hian CDF-Hualngoram sipaite inkulhna hmun zawng zawng, an hmunpui ber Tuichirh camp tiamin CNDF hian an laksak fai vek tawh a. CDF-Hualngoram awp chin zawng zawng pawh la vekin CNDF hian an awp fel tawh a, silai ri pawh nimin tlai atang khan a reh zui a. CDF-Hualngoram mipui sipaite chu an tlan darh vek tawh bawk a, a then chu Mizoram lamah an lo lut a ni.

Hualngoram People's Organisation (HPO) hotu pakhatin phone hmanga Akashvani Aizawl a hrihlh danin CNDF chauh ni lovin anmahni puitu Chin Brotherhood hnuai a pawl hrang hrang ralthuam kengten chuan an tam hneh tak avangin CDF-Hualngoram mipui sipaite chuan an camp-te an hum zo ta lo a. An tlan darh ta vek niin a sawi a. An mite zinga mi 5 an hliam thu sawiin, 4 chu Zokhawthar

damdawi-ina enkawl an nih lai-in pakhat, a hmai a kah chu Champhai district hospital ah enkawl a nih thu a sawi.

Nimin khan chawhma dar 8.45 vel atangin silai a ri tan a, CNDF hian Haimual hnuai atang leh Rihkhawdar dai atanga hualin Khawmawi leh Rihkhawdar a awm CDF-Hualngoram te hian an kap let ve na a, an intam hleih em avangin chawhnu dar 2.30 vel khan an camp-te rauhsanin an tlan darh ta vek a. An awmna hmun hi CNDF sipaite hian an luah bakah HPO hmanga tualchhung sorkar an lo kalpuite pawh CNDF hian chhuhsakin an awp zui ta a ni.

He inkahna-ah hian hriat theih chinah CDF-Hualngoram mi Lalliandinga leh C. Lalhmuakliana te chu kahhlum an ni a. CDF-Hualngoram mi tho mi 2 chu an inkah palh vanga thi ni a thuthang a awm na-in finfiah theih a la ni lo. CNDF lamah sipai 2 an hliam a, Zokhawthar-ah damdawi lama enkawl an nih thu an sawi bawk.

CNDF-te hi Interim Chin National Consultative Council (ICNCC) hnuai a ralthuam keng pawl Chin Brotherhood (CB) nena thawkho an ni a. CDF-Hualngoram erawh hi chu Chin National Front (CNF) leh ralthuam keng pawl Chin National Army (CNA) telna pawl hrang hrang 18 vel insuihkhawmna Chinland Council (CC) a tel a ni thung a. Kumin February ni 26 khan chief minister Pu Lalduhoma din ‘Advocacy Group for Peace in Chinland’ remruatna-in ICNCC leh CC te hian Aizawla CM chenna inah inremna an lo ziak tawh a. Chinland National Constitution duangtu tur pawh pawl 2 aiawh leh Advocacy Group for Peace in Chinland aiawhte nen an ruahman mek lai-in inkahna hi a thleng ta a ni a. Inkahna-ah hian CC a tel pawl dang, CNA tiamin an inrawlh ve lo ni a hriat a ni.

Khawmawi leh Rikhawdar a CNDF leh CDF-Hualngoram te nimina an inkahna a thi C. Lalhmuakmawia (37) chu Aizawl Chanmari West-a an in thlenpui a ni a, vawiin tlai dar 3 khan vui a ni.

<><><>

SOIL SAMPLE

Central Road Research Institute (CRRI) mithiamte chuan Aizawl-Thenzawl-Lunglei kawngpui a lei leh lung sample la-in an hmunpui lamah an thawn.

CRRI atang hian scientist 3 leh technician 2 rawn kalin, June ni 26 khan Lunglei an thleng a. PWD engineer-te nen kawng an zir chiang ani. Kanghmun South khua leh Pukpui inkar kawngpui hmun hrang hranga leilungte la-in nimin khan CRRI hmunpui-ah thawn a ni a. CRRI hmunpui-ah hian leilung sample an thawnte hi lo zir chiangin tlo zawka he lai kawngpui hi siam a nih theih na'n ni 45 chhungin kawng siam dan tur rawtna an rawn siam ang a, PWD-in kawng siamna atana senso zat tur an duang chhuak dawn a ni.

June ni 19 khan Aizawla Indian Road Congress (IRC) inkhawmpui hmang tura lokal IRC president Prof. Manoranjan Parida chuan Council of Scientific and Industrial Research (CSIR) hnuai a awm CRRI mithiamte'n Mizoram kawng a tlo loh chhan an rawn zir chian dawn thu a lo sawi tawh a. Kawngpui a tlo theihna atan chik taka Mizoram leilung zir chian a ngaih thu leh zirchiang tur mithiam an rawn kal dawn thu a lo sawi tawh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

RAINFALL

Kumin January thla atanga June thla chhungin Mizoram district 11 zingah Kolasib-ah ruahtui a tla tam ber a, Lunglei district-ah a tla tlem ber thung.

India Meteorological Department (IMD) in a chhinchhiah danin, kumin January thlaah Mizoramah ruahtui a tla lova, February thla atang khan Kolasib District leh Lengpui-ahte ruah tam vak lo a tla tan a, June thla kha Mizoram hmun hrang hrangah ruahtui a tlak tam ber thla a ni. Kumin January thla atanga June thla chhungin Mizoram district hrang hrang zingah Kolasib-ah ruah a tla tam berin, hemi hun chhung hian millimetre 1,289 point 6 a tla a, Lengpui in dawtin, millimetre 1,086 point 4 a tla a, Siaha district-ah millimetre 1,077 point 4, Aizawl district-ah millimetre 1070 point 5, Champhai District-ah ruah millimetre 766, Mamit District-ah ruah millimetre 561 point 3, Lawngtlai District-ah millimetre 515 point 6, Serchhip District-ah millimetre 499, Lunglei District-ah chuan millimetre 356 point 3 a tla a ni.

IMD, Aizawl Centre, Director, Pu Sudheer Kumar Dwivedi-a chuan Akashvani Regional Unit, Aizawl zawhna chhangin, kumin January thla atanga June thla inkara Mizorama ruahtui tla zat chu a lungawi thlak thawkhat a ti a, district thenkhatah chuan nikum nen khaikhinin kuminah ruahtui a tla tha hle a, hetih rual hian Champhai District leh chhimlamah te chuan ruahtui a tla tlem thung a ti a, hmun hrang hranga ruahtui tla zat danglam chhan hi sik leh sa inthlak danglam, climate change in a nghawng vang niin a sawi a, nikum nen khaikhinin kuminah chuan Mizorama ruahtui tla zat chu zaa 10 atanga 12 velin a pun a rin thu a sawi a bawka a ni.

Byte: IMD, Aizawl Centre, Director Sudheer Kumar Dwivedi

<><><>

PM ARRIVES IN RIO DE JANEIRO

BRICS Summit vawi 17-naa tel turin Prime Minister Narendra Modi-a’n tukin khan Brazil-a Rio de Janeiro khawpui a thleng. Ram 5 – Brazil, Russia, India, China leh South Africa intelkhawm, BRICS thutkhawm hi zaninah tan a ni ang a, thil dang bakah khawvel sorkar inrelbawlna siamthat dan turte, sik leh sa inthlak danglam nasa lutuk chungchangte leh artificial intelligence chungchangte an sawiho dawn a ni.

Thutkhawm zawh fel hunah Pu Modi-a hi Brasilia khawpuiah kalin Brazil President Luiz Inacio Lula da Silva nen ram 2 inkungkaihna tihngheh leh zual dan tur chungchang an sawi dun ang.

<><><>

TEXAS FLASH FLOOD

United States-a Central Texas-a sabereka khuangkaih thleng vanga thi zat chu 51 an tling tawh a, an zingah hian naupang 15 an tel a, tuilenna bula summer camp neih meknaa tel, hmeichhe naupang 27 chin hriat lohvin an la awm mek bawk.

Helai bialah hian nasa taka ruah a sur hnuah darkar 3 chhung lekin Guadalupe lui chu feet 30 chuanga sangha luangin camp neihna hmun bakah lirthei engemawzat a hnawl a, emergency service miten mi 850 chuang an chhanchhuak a ni.

<><><>